

Date – 05/08/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Chief Minister Pu Lalduhoma hovin Mizoram State Disaster Management Authority, vawiin khan an thukhawm.
2. Home Minister Pu K. Sapdangan tukin khan Mizoram Police te tana fitness parade, '45 Minutes for All Ranks of Mizoram Police' a hawng.
3. Ruah sur nasa vanga tunhnaia chhiatna rapthlak tak thlenna, Kerala leh Himachal Pradesh-ah chin hriat lohva awmte zawn beihpui, ngawrh taka thawh chhonzawm zel a ni
4. Hamas leh Hezbollah hruaitu pawimawhte thah an nih avangin West Asia-ah boruak a tang zual.

<><><>

CM

Chief Minister Pu Lalduhoma hovin Mizoram State Disaster Management Authority (SDMA) chu vawiin khan CM Conference Hall-ah an thukhawm.

SDMA chairman Pu Lalduhoma chuan, Cyclone Remal vanga chhiatna rawn endiktu Inter Ministerial Central Team ten an report an thehluh tawh thu leh Finance Ministry lama a awm mek thu a sawi a. Tanpuina engemaw zat pek an in beisei, a ti.

Meeting hian kumin March atanga May thla thlenga leilung chhiatna vanga chenna in chhia 4726 report a awm tawh thu te leh kumin chhunga disaster avanga nunna chan chhinchhiah mi 42 an

awm tawh thu te tarlan a ni a, hei bakah hian Mizoram hmun rukah lirnging tehna khawl (Seismic Observatory) dah mek a nih thu tarlan a ni bawk.

Meeting hian chhanchhuahna hmanrua engemawzat lei thar leh a tul ang zela a hmang tangkaitu tur khawtlang leh pawl hnena hlan te, Geology & Mining lam te hman tur Geotechnical Instruments pawimawh lei te an rel a. Hlimen leh Melthuma leiminin In leh lo a tihchhiatsak chhungkaw 41 te chen lailawkna tur siam a nih thute, Hlimen leh Melthuma hmun him tawk lova ngaih te umzui zel dan tur te an sawi a. Mihring chen tamna hmuna leimin thleng nasa thin tihnep nana tui luankawr mumal zawk leh khuarei daih siam dan tur zirtu tur study team din te pawh an sawi a ni.

Heng bakah hian African Swine Fever vanga harsatna tawk chhungkua te tanpui dan tur pawh sawiin; mumal zawka chhawmdawlina an hmuh theih dan tur ruahman siam ni se, an ti.

He meetingah hian DM& R Minister Pu K. Sapdanga, PWD Minister Pu Vanlalhlana, AH & Vety Minister Pu C. Lalsawivunga, Health Minister Pi Lalrinpuui, PHE Minister Prof. Lalnilawma, Supply Minister Pu B. Lalchhanzova leh Chief Secretary Dr. Renu Sharma bakah member dang te an tel a ni.

<><><>

GOVERNOR

Larsap Dr.Hari Babu Kambhampati hovin “Protect the Elusive” tih thupui hmangin International Clouded Leopard Day vawiin khan Mizoram University ah hman a ni.

International Clouded Leopard Day hi nimin kha a ni a, vawiinah he hun hi hman a ni a, Khawvel huap Kelrâl Ni ah hian Larsap chuan thusawiin Clouded Leopard hi ramsa vang tak a ni a, Mizoramin hetiang Ramsa a la nei hi vannei hle a. Mizorama ramsa vang tak leh mang mai thei dinhmun a din mek te leh an chenna ramngaw humhalhna leh ven hi Mizoram mipui te mawhphurhna a ni a ti.

Larsap Dr.Hari Babu Kambhampati chuan International Clouded Leopard day pual hian Mizorama Kelrâl leh ramsa dang te, ramngaw, lui leh nungcha dang te humhalhna kawnga thawktu zawng zawng te hnenah lawmthu sawiin, tha thlah lova ramsa leh

ramngaw te humhalhna kawnga thawk zel turin Mizoram mipui te a ngen bawk a ni.



EDUCATION MINISTER

Higher & Technical Education Minister Dr. Vanlalthlanan zirtirtu indaihlohna avanga harsatna chu Mizoram sorkar hnuaiia college zawng zawng tawh mek a nih avangin zirtirtu sem rual buaipui mek a nih thu a sawi.

Vawiin khan a pisa ah thutharlakhawmtute kawmin MZP Headquarters hmalaknaa Govt. Champhai College – a Political Science leh Economics zirtirtu indaihlohna avanga lungawi lohna lantira Champhai khaw chhunga zirna in leh sorkar pisa kai tur dan ani chu pawia tih thu a sawi a, Govt. Champhai College chu sorkarin a duhsak thu sawiin, RUSA 1, RUSA 2 leh PM – USHA atanga thuam that mek a nih bakah zirtirtu dah belh chungchangah pawh a hrana post siam belhna tura thutlukna siamsak an nih tawh thu a sawi a. Mizoram puma college zirtirtu khairual zawka kalpui a nih theih nan Sorkarin fimkhur taka hma a lak mek hrilhhriat an nih hnu pawha zirna leh sorkar tikhailak zawnga hmalak a ni chu pawia tih thu a sawi.

Minister chuan MZP Hqrs Champhai atangin May ni 3 leh July ni 18 khan lehkha dawn a nih thu sawiin lehkha dawn te hi Minister leh Commissioner hova sawi ho a ni a ti a. Zirtirtu sem rual chu sorkar hmalak mekna a nih avang leh hmun dang atang pawha lehkha dawn a nih avangin a rang thei ang bera thutlukna siam a ni a ti a. College pakhat tana a bika transfer lo tih hian zirchianna a tihbuai theih avangin MZP Hqrs Champhai chu an hmalakna chhonzawm lo tur leh zirtirtu semrualna kalpui mek chu lo ngaichang turin a ngen a ni.

Champhai Mizo Zirlai Pawl Headquarters chuan Govt. Champhai College-a Political Science leh Economic Subject zirtirtu indaih loh avanga lungawi lohna lantiran vawiin khan zirna in leh Sawrkar pisa zawng zawng, kai tur an dang a, Sawrkar Office leh Sikul kai an awm lo a.

Hetihlai hian Bank te leh Hospital te erawh dan pangngaiin an kal thei a, he boruak avang hian khawi hmun atang mahin boruak duhawm lo a thleng lo nia thu dawn a ni.

MZP Hqrs.Champhai President H.Lalruatdika hnen atanga thu dawn danin, Mizoram sawrkar atanga an lungawina tham thu

lawmawm an dawng a nih loh chuan naktukah pawh Zirlai Pawl te hian a ngai angin Sawrkar Pisa leh Zirna In a kai turte dan chhonzawm leh an tum a ni.



HOME MINISTER

Home Minister Pu K. Sapdangan tukin khan Aizawl Armed Venga 1st Batallion MAP Ground-ah 'Train to Excel' tih thupui hmangin fitness parade, '45 Minutes for All Ranks of Mizoram Police' a hawng a. Mizoram pum huap tur a ni a, tukin khan district dangah pawh hman tan a ni.

Pu K. Sapdanga chuan Mizoram puma Police-te tana taksa sawizawi leh hrilselna lam hawi hmalakna 'fitness parade' bultan a ni chu hmasawna tura intuitharna mellung chhinchhiah reng tur a nih ngei a beisei thu a sawi a. Mizoram Police-te chu UT hunlai atang tawha hun rei tak chhung India ram Police-te zinga rinkai langsar leh hmingtha an lo nih tawh thin thu leh mipuite rinngam ni leh tura bultanna fitness parade, 'Train to Excel' thupui hmanga buatsaih chuan rahtha a chhuah ngei a beisei thu a sawi a.

Home Minister chuan rinngama hnathawk turin fitness tihpun a ngaih thu sawiin, kumin August ni 3 thlengin Police thi chhinchhiah zhat mi 77 niin kum 50 hnuailam an ni tlangpui a ti a, thih thut theihna thlentu ruihhlo leh a kaihnawih natna do beihpui thlak a tul hle a ni, a ti. Police-te chu Dan kengkawha mipui venghim tur an nih thu sawiin, rintlak ni turin khauh zawka kal a ngai a, hei hi ram leh mimal tana tha zawk tur a ni, a ti a. Police-te chu taksa sawizawi bakah ei tur hrisel ei tam tur leh ruihhlo laka fihlim tum tura fuihin, Armed Branch lam bik tan Battalion tinte chu parade leh physical training regular taka neih chhonzawm tum turin a chah a, enzui a nih tur thu a sawi bawk.

Pu K. Sapdanga chuan Ram pawn atanga dan lova ruihhlo tawh tam tham tak veivak leh man chhuah tur a awm reng thin chu veiawm tiin, hemi kawngah hian tanlak thar a tul thu leh beihpui thlaka a chhan tak chhuizuia zirchian a tul thu a sawi a. Mizoram Police-in Women Police a neih tlem thu leh mamawh belh a nih thu tarlangin, unarmed unit mai bakah armed unit lamah pawh mizo hmeichhia ralthuam famkima inthuam Sawrkarin hmuh a duh thu sawiin mizo nulata lo inring turin a sawm a ni.

Mizoram sorkar Home Department in police hnathawktuten taksa hrisel leh chak zawk (physical fitness) an neih theihna tura hma a lakna Train to Excel program hi hmun dang rualin Kolasib SP Pu David H. Lalthangliana, MPS hovin SP office tualah hman ani a.

Kolasib SP office a police te chu SP office atanga ATS petrol pump thleng ke-in an kal a, heta tang hian let in, SP office tualah Physical Training neiin, SP ho hian taksa sawizawina hun an hmang ani.


He hunah hian SP, SDPO Pu Manjit Singh Sankhla, IPS; Police officer thenkhat leh police thahnem tak an tel.



KERALA & HIMACHAL SEARCH OPS

Ruah sur nasa vanga tunhnaia chhiatna rapthlak tak thlenna, Kerala leh Himachal Pradesh-ah chin hriat lohva awmte zawn beihpui, ngawrh taka thawh chhonzawm zel a ni a, Kerala-a Thawhlehi kaltaa leimin nasa tak thlenna, Wayanad-ah vawiin khan ruang pakhat hmuh leh a ni a, helai bial hi zone 12-ah thenin ui finge nen mibo-te zawn hna, ngawrh taka thawh zel a ni. Hetih lai hian, hlawmtu awm lo ruang 31-te chu vawiin khan Puththumala-ah vui an ni a, mihring taksa bung hrang hrang 158 chhar khawmte pawh DNA sample lak hnuah phum an ni.

Himachal Pradesh-a ruah bawhawk sur vanga chhiatna thlenna, Shimla, Mandi leh Kullu Dist-ah te pawh vawiin a ni 5-na thleng khan chin hriat lohva awmte zawn hna thawh a ni a, Shimla Dist-a Dogri-ah ruang 2 hmuh leh a ni. Akashvani Corr sawi danin, tun thlengin mi 40 vel, chin hriat lohvin an la awm a ni.



ZIKA VIRUS

Maharashtra-a Pune-ah nimin khan nu naupai lai 5 leh midang 2-in, thosi seh atanga natna hri inkaichhawn theih, Zika an vei tih hmuhchhuah leh a ni a, hengte nen hian Zika hri kai mi 72 hmuhchhuah a ni tawh a ni.

Pune khawpui ringawtah pawh hri kai 65 hmuh chhuah a ni tawh a, nimina hri kai 7 hmuh belh zingah hian nu naupai lai 5 bakah thalai kum 18 mi leh mipa kum 40 mi an tel a ni. Pune Health Dept sawi danin, National Institute of Virology leh Sassoon Hospital-ah thisen endik lai engemawzat a la awm avangin hri kai zat hi a pun chhoh rin a ni a, National Institute of Virology team-in Zika hri hmuhna hmuna thosi leh thosi no-te lak khawmin an endik mek a ni.



WEST ASIA CRISIS

Iran leh Hezbollah-te atanga Israel beihrawnna thleng thei avanga inralring turin US Secy of State, Antony Blinken-an G7 Foreign Minister-te a ngen nia sawi a ni a, tunhnaiah Hamas leh Hezbollah mi pawimawhte thah an nih avangin West Asia-ah boruak a sang chho zual a ni.

Tunhnai khan Hamas political hruaitu lu, Ismail Haniyeh leh Hezoballah senior commander, Fuad Shukr-te chu Israel sipaite beihpui thlaknaah an thi nia sawi a ni a, Iran President Masoud Pezeshkian-a chuan Israel kuta Hamas hruaitu thihna chu chhan let lohvin a awm lovang tih a sawi a ni.

